

2001 年春聯

2000 年阮兜个春聯是按呢寫个：

上聯：萬水千山車跋反

下聯：安居樂業度餘生

寫出一个五十五歲个中年人，車跋反一世以後，想卜平靜度過餘生个心情。今年 2001 年，過年過，加一歲，我也五十六咯！我个心情閣卡平靜，萬項代誌看閣卡開。新春个門聯也無啥共款。

其一[大門]

橫披：歡歡喜喜送千禧

上聯：無閒切切廿世紀

下聯：好命咚咚三代人

【說明】二十世紀个台灣人確實真扑拚，經過日本時代、蔣家時代、李登輝時代到陳水扁時代，台灣人實在是無閒切切(chih⁴x)，無一時間。俗語講「有經霜雪有逢春」，台灣人出頭天个時代也已經到咯，對廿一世紀起，台灣人卜脫離苦海，永遠攏卜好命咚咚過日子。來！逐家歡歡喜喜來送二十世紀最後个「千禧年」。

其一[二樓]

橫披：阿里雅多新台灣

上聯：莎啲那拉舊年尾

下聯：烏哈旨有新紀元

【說明】二十世紀最後一个「舊年尾」，再見！莎啲那拉〔さようなら〕！廿一世紀个「新紀元」啊！爻早！烏哈旨有〔おはよう〕！從今以後台灣人袂閣親像廿一世紀按呢受盡獨裁者个苦毒矣啦。多謝！阿里雅多〔ありがとう〕！民主个新台灣。

上聯：有箍齒毛儻

下聯：無事心輕鬆

【說明】有「箍箍」，有錢啦。有錢實在齒毛有夠儻(can²)，卜愛啥貨著有啥貨，箍箍仔逐家都無嫌儻啦。益毋過無錢，也無一定悲哀啦，只要平安無事，心情輕鬆也袂㊟。人若知足，著知影什麼叫做「好命」，袂曉知足，就是有箍箍，也是「福氣到毋知」講一。

其二[五樓]

橫披：歲歲平安日日春

上聯：天天難過天天過

下聯：步步照行步步昇

【說明】人講做「雞著筊(ching²)，做人著秉(ping²)」，做雞、「筊」著有通食，做人、「秉」也無定著「秉」有物件，有時愈秉愈落魄，做人實在真歹命。但是閣卡按怎艱苦，做人毋通怨嘆，「天天」(日日)難過，嘛愛「天天仔」過，樂暢樂暢過日子著著啦。雖然是樂暢過日子，毋過做人个道理嘛愛守，一步一步攏著愛照天理行，跔踏實地，一步一步一跔印，慢慢仔進步，慢慢仔改善咱个生活，絕對毋通想卜一步登天，食無三把甕菜著卜上西天。無，天頂飛袂起去，煞顛倒摔一下半小死。求平安著好、免求添福壽，跔踏實地，安份守己過日子，咱著歲歲平安、日日有通偕。